



KEMENTERIAN PERPADUAN NEGARA

TEKS UCAPAN

**YB DATUK AARON AGO DAGANG
MENTERI PERPADUAN NEGARA**

**SEMPENA
MAJLIS BUKA PUASA PERPADUAN ANGKATAN BELIA
ISLAM MALAYSIA (ABIM)**

19 MAC 2025 (RABU)

**KOMPLEKS NASYRUL QURAN
PRESINT 14 PUTRAJAYA**

Salam Perpaduan dan Salam Malaysia Madani.

SALUTASI

**Salutasi terkini disediakan secara berasingan*

PENDAHULUAN

1. Saya ingin merakamkan penghargaan kepada **Regional Islamic Da'wah Council of Southeast Asia & The Pacific (RISEAP), Angkatan Belia Islam Malaysia (ABIM) dan Kompleks Nasyrul Quran** atas penganjuran **Majlis Iftar Muhibah 2025**.
2. Majlis seperti ini mempunyai kepentingan yang besar dalam mengukuhkan perpaduan dan keharmonian negara kita. **Malaysia, sebagai sebuah negara majmuk, bergantung kepada sikap saling memahami, menghormati dan menerima antara satu sama lain.** Justeru, majlis berbuka puasa bersama ini menjadi satu simbol kebersamaan yang **merapatkan hubungan antara masyarakat tanpa mengira perbezaan.**
3. Selain itu, ia memupuk semangat kefahaman dan toleransi. Apabila rakan-rakan bukan Islam hadir dan bersama-sama menyaksikan amalan berbuka puasa, mereka dapat lebih

memahami adat dan ibadah yang diamalkan oleh umat Islam. Dalam masa yang sama, umat Islam juga dapat menunjukkan keterbukaan. **Inilah yang kita mahukan masyarakat yang saling memahami, bukan sekadar hidup bersama tetapi juga meraikan perbezaan dengan penuh harmoni.**

4. Saya yakin majlis ini **membantu memperkukuh identiti nasional** kita sebagai rakyat Malaysia. Apabila kita dapat duduk bersama, berkongsi makanan dan berbual mesra, ia menanamkan rasa kebersamaan yang lebih mendalam. Kita bukan sekadar rakyat Malaysia atas kad pengenalan/surat beranak, tetapi benar-benar bersatu hati dalam menghayati semangat perpaduan.

INISIATIF HARMONI MADANI

Hadirin yang dihormati sekalian,

5. Dalam usaha mempromosikan keharmonian antara penganut agama, pelbagai program telah dirangka dan dijalankan oleh Kementerian Perpaduan Negara melalui Jabatan Perpaduan Negara. Antaranya adalah inisiatif ini dilaksanakan dengan **mengetengahkan konsep Faham, Hormat, dan Terima, yang merupakan asas integrasi**

nasional untuk mempromosikan pemahaman dan penghormatan terhadap kepelbagaian budaya dan agama.

6. Antara program dilaksanakan adalah **Sambutan Minggu Keharmonian, Sambutan Hari Toleransi, Jejak Harmoni, Podcast Harmoni, Dokumentari Harmoni, dan Dialog Harmoni.**
7. Saya menyeru agar semua pihak tidak kira sama ada pertubuhan badan bukan kerajaan, pertubuhan belia dan persatuan komuniti untuk **memperbanyakkan penganjuran program seperti Iftar Harmoni, Dialog Harmoni dan Jejak Harmoni** antara belia pelbagai agama bagi membina persefahaman yang lebih mendalam.
8. Untuk makluman semua, bagi meningkatkan hubungan keharmonian di peringkat generasi muda yang berbilang agama, **Kementerian Perpaduan Negara sedang meneliti cadangan yang dikemukakan oleh Pertubuhan Architects of Diversity bagi menubuhkan Gabungan Belia Agama (Youth Interfaith Alliance).**
9. Saya juga berharap agar semua pihak **memainkan peranan dalam memupuk nilai kesederhanaan (wasatiyyah) dalam kalangan generasi muda,** agar mereka dapat menjadi ejen perpaduan yang aktif dalam komuniti masing-

masing. Bak kata pepatah Melayu ‘melentur buluh biarlah dari rebungunya’.

PENUTUP

Hadirin yang dikasihi sekalian,

10. Majlis Iftar Muhibah 2025 ini mengingatkan kita bahawa **kepelbagaian bukanlah penghalang kepada perpaduan, tetapi harus dijadikan sebagai satu kekuatan dalam membentuk masyarakat yang lebih inklusif.** Kepelbagaian budaya, agama, dan latar belakang tidak seharusnya menjadi jurang pemisah, sebaliknya menjadi landasan untuk kita saling memahami, menghormati, dan bekerjasama demi kesejahteraan bersama.
11. Semoga usaha murni ini diberkati dan membawa manfaat kepada seluruh rakyat Malaysia.

Sekian, terima kasih.